

**Date – 01/12/2024**

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

1. Kuthnathawktuten man man zawka an thlai tharte an hralh theih nana hmalak chu sawrkarin a tum ber a nih thu Agriculture Minister Pu PC Vanlalruata'n a sawi.
2. Mizoram sorkar hnuaiiah thlai thar lei leh hralh chungchanga hmalakna kalpui tan a ni.
3. Tun thla ni 9 atanga ngaih-hnathiamna tel lova lirthei endik hna Traffice Police ten an kalpui dawn avangin tunlai hian lirthei khu pek chhuah endikna hmun a lun thei hle.



### **AGRI. MINISTER**

Kuthnathawktuten man man zawka an thlai tharte an hralh theih nana hmalak chu sawrkarin a tum ber a nih thu Agriculture, Irrigation & Water Resources Minister Pu PC Vanlalruata'n a sawi.

Thenzawl Dragon Fruit Growers & Marketing Society General Assembly Vawi 4-na a hmanpuinaah nimin khan he thu hi sawiin Minister chuan, ZPM sawrkar chuan kuthnathawktute a dah pawimawh ber a, kuthnathawktute lamah sawrkar a tang tlat dawn a ti a; thawhona tha tak an neih a pawimawh thu a sawi baw.

Minister chuan, Zau ang zawnga hmalak chu sawrkar auhla a nih angin kalpui an tum tih a sawi a, sawrkar tana model ni thei tura Lamlian Dung Zau-a Thenzawl Dragon Fruit Growers & Marketing Society te hmalakna chu fakawm a tih thu a sawi. Local Soda Pvt.Ltd te nena thawhona thuthlung an ziaak pawh Minister chuan lawmawm a tih thu sawiin kuthnathawktuten thei leh thlai an tharchhuahte chu thei tui emaw wine emawa siam chhuah a nih theih nan dan siam that tum mek a ni, a ti a. Food Processing lama hmalak an tum dan a sawi baw.

Thenzawl Dragon Fruit Growers & Marketing Society ten kum tina an hman thin General Assembly hi Lamlian Dung Zau-ah hman a ni a. Minister Pu PC Vanlalruata hi Pu Lalmanpuia Punte Adviser to Chief Minister; Aizawl South III Bialtu MLA Baryl Vannehsangi leh South Tuipui Bialtu MLA Pu Jeje Lalpekhlua ten an tawiawm a ni.



## CHIEF SECRETARY – PM VISHWAKARMA SCHEME

Kutthemthiamte tanpui nana sorkar laipuiin ruahmanna a siam, PM Vishwakarma chu mipuiin hlawk taka an hman theih nan mipui hrilhhriat kawngah theihtawp chhuah turin Chief Secretary Khilli Ram Meena-a'n Department-te a chah.

Chief Secretary hian nimin khan Aizawl Sipai Lammuala buatsaih PM Vishwakarma Exhibition-cum-Trade tlawhin PM Vishwakarma thil tum chu a hlawhtlin theih nan leh hmun kilkhawr zawk a thlen theih nan theihtawp chhuah turin thawktute a chah a. Mahni kutkawiha eizawna bul tan duhte pui turin Bank hrang hrang te pawhin Loan hmanga theihtawp an chhuah a ngai tih sawiin hmasawn tumte pui turin a chah bawk.

Chief Secretary chuan bul tan mekte mamawh leh pawimawh zingah tharchhuah hralhna tur ngaihtuah a tul hmasa, a ti a; theihtawp chhuahpui tura department-te hrilhin sawrkar leh mipui thawhhona tha awm tura tan la thar theuh turin a chah bawk.

PM Vishwakarma hi nikum khan Prime Minister Narendra Modi-a'n sorkar laipui hmalakna atan a tlangzarh a. Kutthemthiamna kawng hrang hranga thil siam chhuak thei, thiamna neite bul tanna leh an kal zelna atana tanpuina leh khaichhuahna atana a bik taka duan a ni.

Mizoram atang pawhin loan dil hi mi eng emawzat an awm tawh a, mi pali hnenah pek chhuah a ni tawh. Tun tum Exhibition cum Trade Fair-ah pawh hian mahni kut themthiam thil pho chhuak mi 41 an awm a, an vaiin Certificate leh Memento hlan vek an ni.

PM Vishwakarma Scheme-ah hian Mizoramah chuan Commerce & Industries Department chu Nodal Department a ni a, MSME DFO te nen an thawkho a, hrechiang duh chuan Project Management Unit (PMU) C71 Department leh Secretariat lamah te ngaihven theih a ni.



## NERACE

Mizoram sorkar hnuaiah thlai thar lei leh hralh chungchanga hmalakna kalpui tan a ni.

Nimin zing atang khan North Eastern Region Agri Commodity e-connect (NERACE) leh Mizoram Agricultural Marketing Board (MAMB) te tangdun chuan Champhai District Dungtlang khuua sawhthing thianglim leh fai tha, Grade-A, Metric Ton 11 chu Hliappui Self Help Group (SHG) VO1 Ginger Processing Unit hnenah an hralh a. Hliappui SHG hian heng Sawhthingte hi a tul angin an sawngbawl dawn a ni.

NERACE hian Sawhthing bakah Hmarcha lei leh hralh thu-ah Online kal tlanga a leitu tur leh a thartu farmer society-te thlun zawm turin hma an la mek a. Mizoram Agricultural Marketing Board nen thawk dunin Mizoramin Sawhthing a thar chhuah ang angte man man zawka hralh a nih theih nan hma an la mek a ni.



## **AIR ON SOCIAL MEDIA**

Chanchin thar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



## **CHIEF MINISTER AT CARSON THEOLOGICAL COLLEGE**

Chief Minister Pu Lalduhoma'n Aizawl Zarkawt Venga Carson Theological College & Seminary Graduation Day vawi 10-na nimin khan Zarkawt Community Hall-ah a hmanpui.

Chief Minister chuan Chin Hills-a Missionary lut hmasa ber Rev. Arthur E. Carson hming chawia din Carson Baptist Church ten Pathian thu zirna leh chanchin tha thehdarhna kawnga hma an lakna fakin, thalai tam takten sual kawng zawha nun dan tha lo tak taka an nun laia rawngbawl tura thalai engemawzat an lo inzir mup mup chu hmuh a nuam a ni, a ti a. Carson Theological College & Seminary kal zelna turah duhsakna hlanin Pathian zawn chhuah Zofate tan Pathian rawngbawl hi malsawmna hnar a ni, a ti.

Carson Theological College & Seminary-ah hian zirlai naupang 30 vel an kal thin a. A tam ber hi Tripura, Bangladesh leh Myanmar atanga kal an ni thin. Tun kum an academic session-ah hian zirlai naupang 16 an pass a ni.



## **POLLUTION UNDER CONTROL CERTIFICATE (PUCC)**

Tun thla ni 9 atanga ngaih-hnathiamna tel lova lirthei endik hna Traffice Police ten an kalpui dawn avangin tunlai hian lirthei khu pek chhuah endikna hmun a lun thei hle.

Akashvani News Aizawl zawhna chhangin MINECO-a Lirthei khu pek chhuah endiktute chuan sorkarin ngaih-hnathiamna tel loa lirthei endik tur thu a puan hnuah lirthei khu pek chhuah endik tur an pung hluai tih an sawi a; a hma chuan ni khatah chawhualin lirthei 150 vel an endik thin laiin tunlaih chuan ni khatah lirthei 300 vel an endik thin tih an sawi.

Aizawl khawpui huam chhungah hian lirthei khu endikna pali a awm mek a. MINECO, Hlimen, Rangvamual leh Zemabawkah te sorkar hriatpuiin a endik theih a, hei bakah hian hmun thenkhatah mimala endikna siam an awm bawk.

Lirthei khu endik man hi Two wheeler tan Cheng 60 a ni a, diesel hmang lirthei tan Cheng 150 niin petrol hmang tan Cheng 120 a ni. Truck lian endik man chu Cheng 200 a ni a, Auto-rickshaw endik man chu Cheng 80 a ni. No Tolerance Drive hman la ni lo mah se Traffic Police te hian ni tinin lirthei hi an endik reng tho a, Zirtawpni khan Aizawlah Traffic Rules bawhchhia man nualin an mante hi Two Wheeler 24 leh LMV 6 a ni a, pawisa chawitir zat chu Sing 2 Sang 2 leh 500 a ni, kan Corr. chuan a ti.

No Tolerance Week hi Mamit District-ah chuan kalpui a ni tawh a, Zirtawpni khan Mamit khawpui chhung hmun 4-ah lirthei vei vakte endik a ni a. Mamit SP, Pukhraj Kamal-a chuan Krismas leh kumthar mipui te'n hlim leh thlamuang taka an hman theih nan dan phal loh thil chi hrang hrang leh mipui nun tiralmuang lote ven nan endikna chu kalpui a nih thu a sawi.

Zirtawpnia lirthei 329 endikah hian mi 29 chu chawitir an ni a, an pawisa chawi tlingkhawm hi Cheng Sing 3 Sang 8 a ni.



### **CHHIMTUIPUI WILDLIFE DIVISION**

Chhimtuipui Wildlife Division Deputy Conservator of Forest chuan tunhnaia Sanghal awktu chu Cheng Sing 2 a chawitir.

Lawngtlai District Mampui khuaa loneitu pakhatin a thlam bul hnaia Thang a kamah tunkar Nilaini khan Sanghal a awk tih Forest Department chuan hriain an chhuizui nghal a. Sanghal awktu hnen atang hian Sanghal Sarep hrang 26, Sanghal lu leh a ke pathum mansakin he thu kal zelah hian Deputy Conservator of Forest, Chhimtuipui Wildlife Division, Lawngtlai chuan The Wildlife Protection Act 1972 tlawhchhanin Sanghal awktu hi Cheng Sing 2 a chawitir.

Sanghal sa an man te hi Deputy Conservator of Forest, Chhimtuipui Wildlife Division, Lawngtlai Office bulah halral a ni.



### **ARVIND KEJRIWAL**

Delhi police-te chuan Zirtawpni-a padyatra an neihnaah Delhi Chief Minister hlui Arvind Kejriwal-a tuia thehtu chu an man. Tui-a theh tumtu hi police te chuan a theh rualin an man nghal a ni. A theh chhan hi Delhi police-te chuan an zawtfiah mek a ni



### **BANGLADESH**

Bangladesh Foreign Affairs Adviser Md Touhid Hossain chuan, Bangladesh chuan India nena inlaichinna nghet tak neih reng a beisei a thu a sawi, ram pahnihte hamthatna a duhsak thu a sawi bawk . Nimin khan Dhaka-a North South University-ah “Bangladesh-India Relations: Expectations, Barriers, and Future” tih thupui hmanga roundtable discussion neihah thu a sawi a, Hossain chuan tun hnaiah harsatna awm mah se, India nena inzawmna siamna kawngah beiseina neih a pawimawh thu a sawi a ni.

